



**Biolentzia giroa dela eta palestinarren aurka zigor neurriak har litzake Rabinek / 18**



**Kargua Scalfaroren esku utzi arren gobernuburu izaten segituko du Amatok / 16**



**Azkunaren osasun plangintza onartu du Eusko Jaurlaritzak / 8**

**EUSKALDUNON**

# Egunkaria

Asteazkena, 1993ko martxoak 31 / IV. urtea / 718. zenbakia / Salneurria: 90 pta. / 5 libera

**KIROLA**

## Fiz eta Perurena markak hobetzer

Haroren marka hobetzen saiatuko da Fiz datorren larunbatean Azpeitiko zezenplazan, eta Perurenak bi marka hautsi nahi ditu jaialdi berean. / 21

## Ynestrillas absolbitu eta Duceri ehun urteko kartzela ezarri diote

Ultraeskuindarraren partehartzeaz «zalantza serioa» dagoela dio epaiak

Madrileko Entzutegi Nazionalak Angel Duce baino ez du zigortu Josu Muguruzaren hilketagatik, eta Ricardo Saenz de Ynestrillas errurik gabe aske utzi du bere partehartzeaz «zalantza serioak» daudelako. Duceri 99 urte eta zortzi hilabeteko kartzela ezarri dio.

Entzutegiak atzo ezagutarazitako epaiak ez du onartu auzipetuek talde armatua osatu zutenik, eta hori esatea «defendiezina» dela uste du epaimahaia. Epaimahaiko hiru epaileetako batek, Ventura Perez Mariñok, bere ezadostasuna agertu du boto partikularren bitartez: bere ustez Saenz de Ynestrillas errudun da eta auzipetuek «erakunde terroristak» osatzen zuten.

Epaia gogor kritikatu zuten atzo EAJ, EA eta HBk, beste askoren artean. / 4



Saenz de Ynestrillas eta Duce Entzutegi Nazionean izan ziren atzo.

EFE

## Clint Eastwoodentzat Oscar nagusiak

Clint Eastwood izan zen Oscar sariaren gaueko irabazlea: beretzat izan zen zuzendari onenaren saria, berak zuzendu, ekoiztu eta antzeztutako 'Unforgiven' western-ak irabazi zuen filme onenaren Oscarra, eta beste bi sari ere jaso zituen Eastwooden pelikula (bigarren mailako aktorea eta muntaia onena).

Aktore onenak Al Pacino eta Emma Thompson izendatu zituzten, 'Scent of a woman' eta 'Howard's End' filmeetan egindako lanei esker. Ivoryren 'Howard's End-ek' hiru sari eskuratu zituen orotara. Ford Copolaren 'Bram Stoker's Dracula-k' hiru Oscar erdietsi zituen, eta Neil Jordanen 'The Crying Game' polemikoak, jatorrizko gidoi onenaren saria. / 22-23



Bi sari preziatuenak jaso zituen Clint Eastwoodek.

AP

**BESTERIK**

**P O L I T I K A**

Ipar eta Hegoaldeko politikari ugari izan zen Dutoirner zenaren omenaldian / 7

**G I Z A R T E A**

Abereak babesteko lege proiektua onartu du Jaurlaritzak / 8

**K I R O L A**

Kopako final laurdenetako partidua jokatu du gaur Elgorriagak Granollersena aurka / 20

**MALABARISTEN V. TOPAKETA EGINGO DA BEASAINEN DATORREN ASTEAN / 24**



Michele Alliot-Marie.

## Alliot-Marie eta Lamassoure ministro izango dira gobernu berrian

Edouard Balladur Frantziako lehen ministro berriak bere gobernu aurkeztu zion atzo François Mitterrand lehendakariari. Balladurren lehen gobernuak 29 ministro izango ditu eta hauen artean bi euskal herritar: Alain Lamassoure Europako Arazoetarako Ministerioan eta Michelle Alliot-Marie Gazteria eta Kirola Sailean. François Bayrou, Pirinio Atlantiarretako Kontseiluko lehendakaria, Hezkuntza ministroa izango da.

Lehen kohabitazioan Barne ministro izandako Pasquak kargu bera izango du orain ere, eta Pasqua bezala Estatu ministro izango dira Mehaignerie (Justizia), Leotard (Defentsa) eta Veil (Osasuna eta Gizarte Arazoak).

## PSE-EE aurka egon arren Ardanzak Hazienda Saila berregituratu du

Eusko Jaurlaritzako Hazienda Saila berregituratu eta EETik etortako sailburuorde eta zuzendariak kargutik kendu zituen Jose Antonio Ardanza lehendakariak atzoko Gobernu Kontseiluan, PSE-EEko kontseilariak aurka bozkatu zuten arren. Gobernu krisia ez dela konpondu uste dute sozialistek. / 4